

## أمنيات

- سُبيك لُبيك

عبدك وملك إيديك

طلباتك

- بلاش تهزر وحياتك

- والله يا محظوظ ما بهزر

رّكز ودقق في المنظر

أنا العفريت

متسخّر أخدم معاليك

- طاب أنا نفسي في بيت

ويكون تمليك

في قلب عمره ما إتسكن

يرضى بـ أي مكان سكن

لو كان لي قصر

يقدر يكون جنب الأمير

لو كان لي عش

يقدر يطير

لو كنت أفقر مـ الفقير  
ما أملكش غير حبة شجن  
يكون أحن من الوطن  
ويُضمني  
تفاصيل دقيقة تهمني  
نفسي بصحيح  
قلبي الجريح  
يقدر يشوفها في الخيال  
مبقاش ضعيف زي العيال  
وأشوف عينيها الكدابين على شرهم  
أنا بعترف ..  
أنا كنت واحد منهم  
من ضمن أتباع الهوى  
إتنهدت ..  
فارق شفايفها الهوا  
قام مسّني  
خايف أفضفض بـ العياط  
مجاريح في حالتي تحسّني

وأوجع بـ غُلبي قلبهم

يا حزنهم

الحلم طار

وكل مطرح للقا

أصبح مزار

وبحور بُكا

الذكريات..

وجيعة وصعبة ومهلكة

نفسي قوي في صاحب وَّفِي

الأقية بيسند موقفي

وأنا عندي حق

ويقلني لأ

وأنا ماشي في السكة الغلط

إيده في إيدي بتربط

وقت الصعاب

اتنين صحاب

شبعوا من الدنيا محاولة

شبعوا من الدنيا مزاولة

مع بعض و لـ آخر جولة  
جدعان قوي  
يتخانقوا بس على الطاولة  
نفسى فى آلة للزمن  
وأرجع وأعيد كل اللي فات  
أيام زمان  
كانت البيوت بتحضن بعضها  
وقت الشتا  
والدفا  
عمره ما كان لبس هدوم  
كان حُضن مفتوح المدى  
للمشتاقين وقت اللزوم  
أيام زمان  
الحياة كات للمحبة  
مش تجارب زي دلوقتي ودروس  
-معلش أنا  
مضطر أرجع للفانوس  
والله كان نفسى أخدمك  
بس أنت مطلبتش فلوس